

Pravilnika za “45. Tradicionalne Unske lađare”

Član 1.

Tradicionalni Unski lađari su prepoznatljiva bosanskokrupska kulturno-sportska manifestacija jedinstvena na rijeci Uni, koja se vesla u tradicionalnoj unskoj lađi od Crnog jezera do Drvenog mosta u Bosanskoj Krupi, dužine od oko 5km.

Manifestaciju organizuje Grad Bosanska Krupa, koji imenuje organizacioni odbor i nosioca aktivnosti.

Odlukom Grada Bosanska Krupa nosilac aktivnosti manifestacije „Tradicionalnih Unskih lađara“ je Udruženje „Unski lađari“ (u daljem tekstu Organizator).

Član 2.

Tradicionalni Unski lađari se organizuju u prvu subotu mjeseca augusta, a kronometar dan ranije.

Član 3.

Pravo učestvovanja imaju svi BiH i strani državljani s navršenih barem 14 godina do datuma održavanja trke. Maloljetne osobe, koje do datuma održavanja trke imaju više od 14 godina, mogu nastupiti isključivo uz pismeno dopuštenje roditelja, staratelja ili udomitelja dostavljeno Organizatoru uz prijavu ekipe.

Član 4.

Trka se vesla isključivo u tradicionalnoj unskoj drvenoj lađi.

Za vrijeme trke u lađi od opreme dopušteno je imati: podupirače za noge (koji se sastoji od jedne daske), maksimalno 2 rezervna vesla, protutegovi za balans, pomagala za izlivanje vode (kantu ili posudu), te napitke za veslače. Sva navedena oprema se unosi u lađu nakon dopuštenja Organizatora.

U lađi je uoči i za vrijeme trke strogo zabranjeno naknadno postavljati bilo kakve dodatke i dijelove opreme koji nisu definirani ovim pravilnikom.

Član 5.

U lađi se za vrijeme trke može nalaziti isključivo 4 osobe (veslača). Veslači koriste drvena vesla. Uloga veslača je veslanje lađe. U toku trke nije dozvoljena izmjena veslača.

Član 6.

Pregled lađe i opreme obavlja osoba zadužena od strane Organizatora.

Organizator daje saglasnost o ispravnosti lađe na dan brzinske trke (kronometra). Organizator lađe može pregledati i na dan glavne trke.

Ukoliko lađa ne zadovoljava propozicije koje su navedene u članu 17. ovog pravilnika istu će diskvalifikovati.

Član 7.

Brzinska trka (kronometar) je kvalifikacijska trka za startne pozicije.

Organizuje se u centru grada na dijelu rijeke Une od željeznog (start) do drvenog mosta (cilj).

Sve ekipe su dužne doći na kronometar, u suprotnom žlijebom će im biti dodijeljena preostala mjesta.

Brzinska trka je pojedinačna trka za svaku ekipu pri kojoj se mjeri ostvareno vrijeme od starta do cilja brzinske trke. Vrijeme se mjeri opremom koju osigurava Organizator.

Brzinska trka započinje tako što lađa zauzme položaj na odgovarajućem mjestu, koje odredi Organizator, ispod Željeznog mosta. Ekipa daje saglasnost za vrijeme starta, nakon čeka organizator podiže bijelu zastavicu koja se nalazi na dijelu Drvenog mosta koji Organizator odredi.

Spustanje zastavice je znak za početak brzinske trke, tada počinje teći vrijeme na štoperici. Finiš brzinske trke je kada prednji vrh lađe uđe ispod Drvenog mosta, tada se vrijeme zaustavlja.

Organizator zadržava pravo da označavanje početka i kraja brzinske trke, prilagodi postojećoj opremi i na dan održavanja trke.

Član 8.

Prijava ekipa će se vršiti do dana Brzinske trke. Svaka ekipa može prijaviti najviše 5 članova. Svaki učesnik Unskih lađara sudjeluje na vlastitu odgovornost, i samim činom prijave garantuje svoju psihofizičku sposobnost za nastup na trci Unskih lađara.

Svaki učesnik može biti prijavljen u samo jednoj ekipi. Utrke mogu veslati isključivo prijavljeni veslači. Naziv ekipe ne smije biti uvrjedljivoga sadržaja, ne smije propagirati bilo kakvu političku poruku ili političku stranku.

Član 9.

Start glavne trke Unskih lađara je na Crnom jezeru, čiji tačan položaj definira Organizator.

Organizator je zadužen za pravilno postavljanje startne linije, te evidentiranje ostvarenih rezultata.

Član 9.a

Na startu lađe se redaju ispod startne linije nakon što ih prozove glavni sudac. Redanje lađi se vrši u više redova. Ekipa sa prvim startnim mjestom staje u sredinu toka rijeke, a ispod linije gdje stoji natpis start.

Parni brojevi se redaju na desnu, a neparni na lijevu stranu u odnosu na prvoplasiranoga (položaj gledanja nizvodno).

Broj lađi u prvom redu određuje Organizator.

Glavni sudija je zadužen za pravilan start utrke. Start utrke može biti ponovljen ukoliko glavni sudija uoči nepravilnosti.

Glavni sudija će imati pomoćnog sudiju koji je će biti postavljen nizvodno od starta i koji će sinhronizovano pratiti glavnog sudiju i zastavicama da označi kretanje (bijela zastavica) ili ponavljanje starta (crvena zastavica).

Član 10.

Učesnicima Unskih lađara nije dopušteno isticati bilo kakve političke poruke ili obilježja političkih stranaka.

Nepoštivanje odredbi ovog člana sankcionirat će se akteri, diskvalifikacijom cijele ekipe s Unskih lađara.

Član 11.

Korištenje svih u sportu nedozvoljenih stimulativnih sredstava je zabranjeno.

Konzumiranje alkohola prije trke i u toku trke je zabranjeno. Osobe koje budu u vidno alkoholiziranom stanju ne mogu sudjelovati na Unskim lađarima.

Nepoštivanje odredbi ovog člana sankcionirat će se akteri, diskvalifikacijom pojedinaca ili cijele ekipe s Unskih lađara, o čemu odlučuje glavni sudija.

Član 12.

Učesnici Unskih lađara se moraju ponašati sportski. Zabranjen je svaki fizički sukob, psovanje, vrijeđanje, prijetnja ili bilo kakav drugi nasrtaj od strane članova ekipa na: druge učesnike, ekipe, suce, osobe ovlaštene od strane Organizatora za određene poslove, gledaoce ili prema bilo kojoj službenoj osobi.

Nepoštivanje odredbi ovog člana sankcionisat će se diskvalifikacijom aktera i cijele ekipe s Unskih lađara, o čemu odlučuje Organizacioni odbor.

Član 12.a

Pojedincima koji su sudjelovali u bilo kakvim radnjama koje su ovim članom zabranjene može se izreći zabrana sudjelovanja na trci Unski lađari, na rok od jedne do pet godina, te doživotno, te im se doživotno zabranjuje kandidiranje i izbor u bilo koje tijelo ili organ Udruženja Unski lađari, o čemu odlučuje Upravni odbor.

Član 13.

Trku Unski lađara prate suci koje angažuje Organizator.

Broj sudaca i njihov način praćenja određuje Organizator.

Član 14.

Pravo prijave na eventualne nepravilnosti vezane za trku Unskih lađara ima svaka ekipa najkasnije 15 minuta nakon završetka trke Unski lađara.

Nepravilnosti koje su nastale na utrci Unskih lađara rješavat će glavni sudac s ostalim sucima i Upravnim odborom, u odlučivanje može biti uključen i Organizacioni odbor..

Suci po isteku žalbenog roka održavaju sastanak na kojem se prikupljaju izvještaji sudaca, rješavaju pristigle prijave nepravilnosti, te se donosi Odluka o konačnom poretku zajedno sa eventualno počinjenim nepravilnostima i izrečenim kaznama.

Član 15.

Cilj utrke Unskih lađara je Drveni most u centru Bosanske Krupe. Prolazak posljednjeplasirane ekipe ispod Drvenog mosta, označava kraj utrke Unskih lađara.


Član 16.

Mjesto i vrijeme proglašenja pobjednika kao i visinu nagrada, odredit će Organizacioni odbor posebnom odlukom.

Član 17.

Tradicionalna unska lađa ima sljedeće propozicije:

- lađa je napravljena od drveta
- krive na lađi su napravljene od drveta, minimalan broj kriva je 4 (četiri)
- pojačanja na krivama mogu biti metalna
- prednji i zadnji korman lađe moraju biti od drveta
- spojevi dasaka (sa vanjske strane) su okovani limom
- pod lađe, s vanjske strane, uključujući pod prednjeg i zadnjeg kormana mora biti ravan, uz minimalno odstupanje do 2cm (mjereci od sredine prema bočnim stranama)
- lađa je isključivo premazana zaštitnim sredstvima za drvo, upotreba smola i/ili razni sintetičkih vlakana (kao sto je fiber glass i sl.) je zabranjeno
- ostale dimenzije pogledati sliku br.1 i tabelu br. 1



Slika br. 1

Ukupna dužina lađe	Min 5m; Max 7m
Prednji korman (s unutrašnje strane)	U podu min 30cm, u vrhu min 40cm
Zadnji korman (s unutrašnje strane)	U podu min 40cm, u vrhu min 50cm
Debljina daske	Min 2cm

Tabela br. 1

Član 18.

Tumačenje svih članova ovog pravilnika zadržava Organizator.